

四庫全書

集部

欽定四庫全書

集部

文恭集

御題詩目錄

卷三

詳校官侍講 臣 王燕緒

檢討 臣 何思鈞覆勘

總校官原任中允 臣 王燕緒

校對官編修 臣 于鼎

謄錄監生 臣 周丕

御製題胡宿文恭集

久曾割裂得全難四庫搜羅為復完

是書亦散見永樂大典中經詞臣採

輯復成完本者

如此立朝有本末可教遺帙聽周殘既經呈覽

斯予事自與發潛令彼安通集原應俾鈔錄至文乃合

命鐫刊教坊致語寧忠告道院青詞實異端

胡宿文筆頗佳允宜

刊以傳世第集中兼及道場青詞殊乖正道且代教坊致語及為內中侍御賀詞則尤為瑣狎自當存其正者

刊行全集鈔存可耳

去取之間繫旌瘴示茲大畧付儒官

乾隆乙未仲春

欽定四庫全書

御題詩

欽定四庫全書

集部三

文恭集

別集類二

宋

提要

臣等謹案文恭集五十卷補遺一卷宋胡宿撰宿字武平常州晉陵人天聖二年進士歷官兩浙轉運使召修起居注知制誥由翰林學士拜樞密副使以太子少保致仕文恭其諡也事蹟具宋史本傳宿立朝以廉直著而

學問亦極該博當時文格未變尚沿四六駢偶之習而宿於是體尤工所為朝廷大制作典重瞻麗追踪六朝其五七言律詩波瀾壯濶聲律鏗勺亦可彷彿盛唐遺響陳氏書錄解題載宿集七十卷久無傳本近人編北宋名賢小集所輯僅寥寥數篇厲鶚撰宋詩紀事搜羅至博所錄宿詩亦祇從志乘掇拾未窺全豹至金元好問選唐詩鼓吹誤編入宿詩

二十餘首說者遂以為唐末之人爵里未詳  
今考好問所錄諸詩大半在文恭集內且其  
中有和朱況一首其人為胡氏之婿與宿同  
籍常州具見所撰李太夫人行狀確鑿可据  
好問乃不能考證舛錯至此亦可知金元之  
間其集已罕覩矣今惟永樂大典分採入各  
韻下者裒而錄之計詩文一千五百餘首雖  
未必盡合原目而篇帙較富已可什得其八

九謹以類編次釐為五十卷庶俾藝林好古之士得以復見完書其有永樂大典失採而散見於他書者則別加搜輯為補遺一卷附之於後焉乾隆四十三年九月恭校上

總纂官臣紀昀陸錫熊臣孫士毅

總校官臣陸費墀



欽定四庫全書

集部三

文恭集目錄

別集類二 宋

卷一

賦五首

五言古詩十八首

七言古詩三首

卷二

五言律詩九十一首

卷三

五言律詩二十一首

七言律詩五十首

卷四

七言律言七十六首

卷五

七言律詩二十七首

五言排律十九首

卷六

五言排律三十一首

五言絕句二首

七言絕句八首

卷七

奏議十八首

卷八

奏議九首

狀十一首

議二首

卷九

表十三首

卷十

表十九首

卷十一

表十五首

笏記五首

卷十二

外制三十二首

卷十三

外制四十二首

卷十四

外制九十五首

卷十五

外制四十六首

卷十六

外制二十六首

卷十七

外制四十八首

卷十八

外制七十一首

卷十九

外制五十三首

卷二十

外制四十二首

卷二十一

外制四十九首

卷二十二

内制十二首

卷二十三

內制十四首

卷二十四

內制三十一首

卷二十五

內制五十首

卷二十六

內制四十九首

卷二十七



內制九十首

卷二十八

帖子詞五十二首

上梁文三首

卷二十九

策問六首

頌銘二首

論辨二首

序贊三首

卷三十

書啟十首

卷三十一

書啟二十七首

卷三十二

書啟三十三首

卷三十三

書啟三十首

卷三十四

書啟二十九首

卷三十五

記九首

卷三十六

誌銘二首

卷三十七

誌銘三首

卷三十八

誌銘四首

卷三十九

碑表塔銘三首

卷四十

行狀二首

欽定四庫全書

文恭集卷一

宋 胡宿 撰

賦

正陽門賦

有宋受命惟皇建國獲九金之神鼎應五精之火德將  
以定九廟之攸居彌萬世而不易陋洛陽之如掌纔可  
以備離宮謂函谷之扼關不足以創宸極于是即房心

之廣野據神明之華域得天帝布政之廷命司空度土  
之職中畫郊圻繕營宮室建萬雉之都城順五土之方  
色王畿千里侔日徑之傍開君門九重法天關之上闢  
粵藝祖之創基逮永熙之御歷戰壘尚多寅車未息方  
且法神禹之卑宮循姬文之旰食重長府之仍貫惜露  
臺之勞役惟此應門闕乎盛飾屬三葉之承祧配九皇  
而此迹受萬玉之會朝覽四海之圖籍老上修懽日際  
來格風德周乎四面言語重乎九譯天業輝昌國財厚

積適廣先猷乃籲衆力謂皇居之偪下虧萬乘之尊嚴  
謂寶儉之過中非四方之表則矧帝閭之我我圖天象  
之奕奕一開一闔于以順乎陰陽不壯不麗何以威乎  
戎狄于是申嚴戒告條具章程運松石于海底下杞梓  
于荆衡瓌材畢至美礎森呈詔將作之利器按堪輿之  
秘經天老推策石師督繩畫則瞻乎陽景夕則攷之極  
星雲漢昭回正瑤光于神縣山河表裏裁寶勢于坤靈  
築金椎兮堅重置水槩兮端平子來輸力人謀獻能千

章兮俱度萬斧兮並興賦東山之悅使造靈臺之樂成  
挺庶物而首出恍緣雲而上征覆壓九軌森倚萬楹冠  
廣內以凝宇標正陽而定名寶篆鸞飛耀煌煌之金刻  
榮簷虬聳壯翼翼之瑤京幸兮天黨屹若神行麗譙橫  
互磴道階升雲梁布藻煙瓦搖青方疏洞開璇題彪列  
藹若鮮雲蔽嬋娟之素月鏤檻周施彤欄鉤折宛在半  
空橫連蜷之雌霓俯畢昴之中街聳象魏之雙闕觚稜  
上拂隱日月之回環輦道相過瞰煙雲之明滅綴以昆



金飾之和璧塗腹澄鮮榮光射激離朱奪其目精計然  
喪其心畫形半起而還正勢將翔而復抑跂而望之若  
太陽御六龍升扶桑而耀色迫而察之若威鳳將九雛  
下丹山而接翼東虬兮西獸交鎮兮左右南箕兮北斗  
夾照兮前後赫賴壤以周布爰飛廊而卻走刻雕辰象  
按宣夜之渾儀圖狀神靈選尚方之畫手倕佺飛步來  
曝于南榮曼倩凝睛下窺于朱牖瑰譎萬態于何不有  
雄牖兮赫侈磅礴兮穹崇彈壓兮萬寓冠映兮九宮如

衣服之有冕簪鱗介之宗龍配天之業兮巍巍而蕩蕩

案此下似脫一句

鬱鬱而葱葱俯太行兮卻倚瞰洪河兮注東

漢圖五嶽之形儼存于宇下周制九丘之地悉布于檻  
中是知帝者之有為也闡元極稽遠古述作表聖明之  
功擬議成變化之序宅中肯構法太紫之圓方大壯取  
模用高曾之規矩故能御六辯總羣綱安天下于置器  
尊人主以如堂鼓協氣而中出導靈風而遠翔納物于  
崇丘之富躋民于壽域之康樹闕中天闡三正之教法

建瓴高屋制萬國之侯王若乃分至御辰清寧貺吉攷  
太史之宏議酌觀臺之故實命保章之職仰以占乎五  
雲詔師摯之官中以吹乎六律此所以察羲易之時變  
助箕疇之陰陽又若禮罷神壇詔回天蹕御百常之豐  
樓端九章之華黻肆赭案兮橫霞植靈芝兮翳日俯輪  
奐之神構耀顯印之聖質樹孑孑之雞竿降洋洋之龍  
綽法青赦于帝媯效祝飛于天乙感人之樂悅發于鈞  
霄呼歲之聲喧踰于少室茲又恢一代之典禮俾百王

而祖述大哉三光之所照九賦之所均有宮室以安體  
有衣冠而正身穆穆中夏眈眈紫宸功崇則業大德盛  
則禮尊斯干詠于周家落成百堵建章營于漢代麗極  
千門況乃業包海岳道格乾坤踰蒼姬之拓統超金卯  
之集勲撫和曠俗惠養齊民秋毫皆出帝力率土莫非  
王臣靈臺偃師靡務先王之武闔廬蔽雨施及吾儕之  
人故得中外畢力大小懷欣胥靡之工驩趨乎版築斷  
堦之匠投銜其風斤役不愆素事俱中倫彼土階載乎

往牒茅殿標乎舊文或出墨家之瑣瑣或主玉帶之云

云

案或主原本作或生就文義當是主字玉帶之云云謂漢武帝時公玉帶所上黃帝明堂圖今改正

以大中之法度彼又齷齪而奚足論若乃攷乎默定之  
理剝諸故老之聞正者所以建萬事之紀陽者所以為  
衆陰之君鎮天安之路寢壯帝宅之威神豈人謀之經  
始亦天意之冥存蓋以恢久大之德業崇燕謀于子孫  
利正元亨四德扶于君位謳歌獄訟萬年繫于天閣下  
臣委質盛期棲蹤禁陌睇閭闔之華峻干青冥而烜赫

惕位貌之喧卑悵威顏之疎隔禁門引籍非如司馬之  
朝臣行在獻文復愧甘泉之賦客乃作系曰煌煌特闡  
明明哲后樹華構兮無疆建豐規兮可久拂倚杵之寥  
廓鎮方輿之博厚拓基鞏固將金狄以同堅卜世脩長  
配神樞而不朽者也

建用皇極賦

在昔箕子贊于武王演皇極建用之道為彝倫攸叙之  
綱經以大猷統九疇而克正執乎至德裕萬化而有常

故能立觀天之至教為經國之彝章原夫立民必本于  
大中治衆必由于至寡既抱一以行矣實用九之大者  
體元立制將舉正以適中極深研幾乃立常而化下豈  
不以皇者保大之至極者處中之規建于民則國之寶  
也藏諸用則神而化之肇修乎八政之紀上律乎五行  
之宜酌剛柔動靜之方裁成大本樹正直平康之道表  
正丕基義用遵王仁符守位慎過差之咎取中庸之治  
立乎大法為百世不易之規綜爾羣倫協一統無偏之

義功歸乃聖道格惟皇協九功而時叙體五始而化光  
保合太和克御旁行之道綜制萬變統歸中立之方去  
彼異端謹乎常憲六極所以垂戒五福由之致勸既殊  
塗以同歸由執一以應萬亦同夫三辰上運歸尊乎璇  
極之居四氣旁流取法于斗杓之建無反無側有猷有  
為處人上而欽若正天下以宜其允執厥中仰稽古重  
華之訓莫匪爾極見思文后稷之詩大矣上聖有為羣  
生作則體風行而斯化妙日用而不測故能昭睿哲之



元功建中和之至極

黃離元吉賦

黃居中而秉色離含章而守柔蹈至和而不競統元吉  
以來求繁兮有章履文明之盛位沖然處順被謙益之  
鴻休明兩之卦聿陳黃離之象斯得能居六二之位遂  
配中央之色有文在內符聖人赫赫之明守正于中契  
君子溫溫之德繁英華兮發外迪清明兮在躬安六爻  
而順守執一德以內融煥乃文章發耀于重明之際惡

夫朱紫含華于正色之中豈不以五采平分黃者色之  
懿八卦並列離乃文之粹觀一陰之成象統二美而居  
位法之繼照天光臻下濟之功執以嚮明文德有化成  
之利蓋由體無剛壯道有休明乘初陽而不憂于患履  
大中而克立其誠故能主斯文于易象配其色于土行  
昭明之德內融虛而不耀和順之猷中積動乃咸亨然  
則柔而不害者物之所應剛而自用者衆之所病既章  
明之在御又沖和而守正故得百祥由是而告休萬福

以之而協慶履乎中道守一色以惟醇秉乃至柔配休  
光而為盛精義惟蹟聖文有為雖垂言于麗正俾觀象  
而緝熙黃裳之所謂在中誠非遠爾白賁之但能无咎  
奚足方之異哉美質無華至虛攸保成茲顯懿之德由  
乃黃中之道宜乎重華光表之君為法式而是寶

蒙泉賦

稽易中之奧旨見山下之出泉養蒙之體斯在善利之  
功未宣靜之徐清藏用于濫觴之際動而愈出含滋于

濟物之前立言蓋自先聖育德爰資上賢原夫蒙之為象兮晦而未章泉之為性兮導之斯出將處順以待用貴守蒙而不溢況夫人事在養功未發之時驗以物情當習坎初來之日發彼變盈之地依乎藏疾之山既靈長之斯肇豈利用以為艱守爾齋淪備潛德于一源之內待夫疏導致成功于萬派之間柔以居之漸而著也涓兮之狀初出冽彼之容肇瀉清而不撓善淵之性居中寂爾含虛臍沸之容在下莫潤乎水受之以蒙契木

升于漸允法井養之無窮含德以居蘊斯干之厚利俟  
時而動蓄上善之元功則知蒙實俟時泉惟立象捨之  
則獨安于靜用之則利有攸往居乎善地固不雜于下  
流洩爾靈源信無踰于朽壤豈不以蒙之道貴守其正  
物之用亦存乎時善下之勲未舉守柔之道攸宜將萬  
物而浸彼豈一勺而取斯澄乎秩秩之原至誠自守譬  
彼存存之性果行無虧異夫湛爾中虛淵兮下據思混  
混以致用竭涓涓而至著儻加乎疏導之功庶滄溟之

可助

顏子不貳過賦

偉顏子之賢哉亞聖人之上才既知過以無貳益閑邪  
之不回秉先覺以觀身幾微必顯敦至誠而適道悔吝  
何來原夫處陋巷以屢空冠孔門而博雅能盡去于貳  
過將動由于純嘏事有未善但見乎必先知之改而後  
行孰云乎不早辨也然則過不可顯貴乎內遷貳不可  
長防乎外宣可離則且非乎道有開則必辨其先極深

而研在方寸欲萌之際造形則悟當細瑕未兆之前守  
爾中庸敦乎誠慤去邪惟務于得善達節更聞于好學  
稽仲尼之無大所謂前知攷子路之喜聞誠為後覺莫  
不慎乎幽獨戒在防虞既度思而不亂諒憂患以終無  
自同乎禹稷之道豈比夫師商之徒苟知恥以方迴是  
謂過矣既表微而克正其殆幾乎則知善乃貴乎則遷  
過實重乎勿貳自存淵默之境不在彰聞之地復為德  
本我則體復以終誠幾者動微我則研幾而繹志故得

金史卷一百一十五  
卷一  
改兮勿憚去以無疑蓋慎乎亂之生也且殊乎人必知  
之苟洗心而奉若在滌覽以宜其未嘗復行諒無憂于  
祇悔不可則止豈有患于小疵彼視履考祥退思補過  
皆已成而是改非未朕而能破所以保中道之誠明為  
至聖之翼佐

五言古詩

讌集

鬱陶倦煩暑爽豁逢蕭辰開樽有歡伯傾坐得嘉賓雕



盤薦肥羜寶刀鱠霜鱗清談屏世務善謔到天眞須言  
燭可繼莫訴盃行頻至道諒在已外物不關身

雜興

嚴霜沾百草不問菊與蘭行觀秀色萎坐使芳意殘有  
酒聊自把無萱良鮮懽安得青精飯為駐顏如丹

怨思

陰蟲思哀草羈雌啼空林盛秋授寒服獨夜擣清砧影  
孤隨月瘦肌薄怯霜侵平生託義分夢想在容音山頭

憐化石陌上重辭金安得兩黃鵠因之傳此心

怨詩初調示龐主簿及鄧治中

我生豈不辰貧賤亦偶然讀書飯脫粟差可樂餘年藝  
麻室南端種桑屋東偏弱婦事紡績丁男長力田瓶儲  
苟不乏安用三百廛老翁飽食罷日晏尚高眠豈知天  
地間陵谷有變遷獨恨生苦晚不在羲皇前嘗聞父老  
言醉鄉隔烽烟安得盈觴酒時復中聖賢

碧樓

中條何我我映我縹碧瓦汾水望飛雲參旂眺綠野美  
哉山與河河流疾于馬

讀僧長吉詩

生民類能言茲文特淵邈精韞在希微幽通資寫託狀  
物無遁形舒情有至樂自非妙解機誰抽神奧籥大士  
棲緣巖門前即台嶽翠屏何我我千仞拂寥廓芝朮被  
諸峯煙霞興衆壑中安仁智居旁研華竺學觀法識非  
空了心無少著人境既相於神明信超若作詩三百篇

平淡猶古樂于言雖未忘在理已能覺天質自然美亦  
如和氏璞貯之古錦囊訪我杼山郭杼山空崔嵬然公  
久寂寞中間三百年寂寞無人作何意正始音緒餘在  
清角山旁夏欲休林英春稍落吟登蒼卞餘歸夢華頂  
數駕言整巾瓶仍前侶猿鶴誰言雲無心還依故山泊  
王君玉送歸有春風吹孤雲之句顧予禽鹿安繆此縻人爵居常肱韶  
音幾駭頓金絡比將親椒蘭端欲甘藜藿緬懷淨名庵  
終尋香火約

池臺

層臺遲夕娟清池弄秋水蟾明桂樹間魚躍蓮葉底如  
何惠莊津乃在蒲城裏

遠行

古有悲秋篇遠行第三句人情重辭家客意倦長路征  
馬陟前岡栖烏集喬樹慘淡層陰生號呼勁風怒匣琴  
徒自攜杯酒與誰遇衣帶緩于前衣香非復故

遊矚

旻宇斗澄霽池臺始登臨幽芳無艷質爽籟有真音閒  
雲乍明滅寒鵝忽浮沈青山晴好望白道細堪尋疎蟬  
嘒急管躍鯉應鳴琴微風獵椒桂快哉一披襟

野廬

休舍松石間外物不可必一馬究微言五禽治生術仁  
智得所廬吉祥來此室

珍禽亭

仁人坐高齋忘機宅真粹魚鳥沐餘恩樹石蒙善氣珍

哉島上禽託身良得地

靜齋

鈴閣侍衛稀幕府文書省石上試真茶松間移小鼎吏  
師所至清仁者本便靜

惜花亭

層陰養花天亭榭多春色午氣入衣香東風吹酒力  
戀冶城遊黃金良易得

寄題齋館

東南有仙人玉案經近侍為愛飛來峯翻然下平地白  
雲相與栖絳雪居嘗餌日作冷泉游時尋徑山醉徑山  
有五峰參差標紫翠西山玉芝巖縹緲多雲氣巖間名  
勝僧除館待公至施樹得梗楠開軒對松桂啼鳥傍簷  
楹鳴泉落堦砌蘚徑闊三條籃輿時一詣汲井試茶腴  
援琴和松吹榮啓老來歌華胥午間睡追隨支許遊嘯  
詠羲皇治武林賢主人官儀斗樞貴同是老成人俱懷  
方外志流水與斷壩神交復心契數幅屏山圖三伏挂



廳事長謠紫芝曲遠寄青霞意他年壯赤霄定挹浮丘袂

題飲光亭

林風引石溜席上清且寒主人白羽扇觴客水精盤絃歌泛宮羽酒面生波瀾

送客

秋意不自適況復登河梁眷言送歸客徙倚見斜陽雜珮解席上斑駁嘶路傍風雲感素節絃管思清商菊殘

餘老藥蕙晚非新香何以致叩叩臨行持一觴

邊思

勁氣初折膠奔書聞插羽寒金刁斗鳴夕火兜鈴舉霜  
威畫角雄月思清笳苦驃騎出鏖兵輕車前碯虜一鼓  
繫名王三捷獻英主天山掛雕弓玉塞休強弩龍額近  
封侯華堂盛歌舞

彭山贈貫之

彭山隔重湖落日見孤塔揚舫入空曠煙樹散鵝鴨山

中老臞仙萬頃纖芥納乘風落珠唾暝色遠相答平生  
爾汝分磁鐵契已狎萬緣一笑空箇處無剎法方舟過  
谷隱風雨寒霎霎黎明帶星歸尚及齋鼓踏臨岐戒後  
會梅熟新秧插期我散縑楮莫忘鷗盟歆

七言古詩

謝御書飛白扇子歌

聖皇多才復多藝包犧徒云造書契坦然制作侔日星  
煥有文章賁天地太宗飛白入于神玉堂四字標奇勢

寶跗一學造其精聖祖神孫知善繼萬幾餘力表全能  
三紀體仁成至治金壺貯墨奉嚴禋往年大揭明堂門  
素龍鱗角儼欲舉白鳳翅翼行將翻八會遼邈不可見  
六書細碎何足論仁慈原廟多珍榜河漢黼黻輝朝昏  
天公常勅六丁護在在處處祥煙屯邇英叨籍侍清切  
浴蘭每歲逢佳節鮫人海底織冰綃宮工天上裁紈雪  
彌綸寶箴已珍華泛灑神毫益精絕紛如薄霧翳靈芝  
淡若輕雲拂初日免令常侍登御牀就降王人頌睿札

玉璽封題光姓名孤臣拜手懽且榮  
暘炎扇暍昭慈眷夙夜安民彰聖情  
九門纔傳妙墨出三殿已覺薰風生  
標章有愧參鴻碩視草無能裨聖明  
短歌莫盡形容美微志聊依頌嘆聲

文恭集卷一

欽定四庫全書

文恭集卷二

宋 胡宿 撰

五言律詩

早春

煥沐陽和盛  
蒼筤老色濃  
大明消積雪  
青靄遍諸峰  
遠浪浮蘋鯉  
驚雷起蟄龍  
去年南去鴈  
薊北又相逢

津橋晚望

徙倚津橋上蒼涼樹幄中江雲數峯黑山日半規紅  
葉深依水蘭苔迴得風雪壇春服就歸思羨沂童

井桐

一水清無底雙桐碧有情銀牀翻晝影玉虎墮秋聲  
露葉游絲斷風枝宿鳥驚隔簾人不寐又送月西傾

春晚郊野

岸幘坐前楹天圍極望青月華開嶺霧風影碎池星重  
露驚棲鶴幽叢帶暗螢塵機心久息寧待據梧暝



舟次江口

香吹生蘭渚飛霜下荻州月波清浸夜天幕冷垂秋遠  
嶼迎潮沒寒烟護水浮櫂歌來澤畔知是採菱舟

賦江皋

目睇蘭皋上春波泛早暉畫船人競渡繡羽雉交飛島  
樹殘潮落汀花宿霧稀短亭迷酒市官柳綠依依

西郊二首

高樓十二曲倚遍到斜暉天幕清無翳溪雲凍不飛斷

金匱山房詩集 卷二  
岡殘燒盡遠樹宿禽歸久憶蓮華社鐘聲隔翠微  
遠籟生寒野平蕪弄夕陽天寒空鳥道水落見魚梁  
樹風仍蕩汀葭日映黃津樓慵極目杳杳白雲鄉

慶雲寺檜

寶坊金布地嘉木此含榮吳帝留青蓋湘神駐翠旌  
月移香砌冷風入夜琴清若比東陽樹婆娑意未平

送臧寺丞赴建昌

新擢京司秩初旌幕府賢少年裁美錦晝日撫鳴絃  
山

好當衙際雲間至榻前庭中無一事時問岳僧禪

送君為從事東歸

秋半飭歸舲輕橈入水鄉吳歌聞子夜陶菊見重陽月  
浦鯢收浪霜空鳥拂檣南冠歸未得潘鬢莫蒼浪

送孫從事

三十一仙科同時升大羅軒翔幾人去淪謫獨君何淮  
桂牽吟數湘蘭寄恨多且欣彈頓弁榮路未蹉跎

送王從事赴漳州

再奉天官集初登郡將筵檄材磨盾妙賓履躡珠賢舊  
洞毛生竹新池水映蓮幕中多暇日曳彩戲親前

禁直晨興呈承旨侍郎

內殿已攢點

禁中漏盡謂之攢點

攬衣朝未央月低銜禁樹雲薄

護朝霜欲放魚文鑰先含雞舌香大昕鴈與鷺奏事向  
明光

館中候馬

紫陌歸鞦後端門午鼓餘銅池銜落景鐵槩掩殘書水

遠溝聲細花間壁影疎去驕呼已遠自笑守應廬

案應廬二

字未詳所本宿又有上小謝學士啓云更直應廬當是指秘閣直舍而言

### 近郊

信馬斗城外芳郊秋物多丹楓驚歲晏華黍喜時和野老醉相話牧童閒自歌牛羊稍覺晚一一下層坡

### 沙鳥

一啄樊籠外蕭然烟水鄉折蘆翻夕夢急雨亂秋行南澗漁波淺西風菰米香世無摩詰手誰與入清防

歲除

守歲薰爐永迎年煦律回仙人收臘去木帝送春來桂  
伴陰蟾隱梅衝艷雪開平明喧壽譔柏葉奉懼杯

鸚鵡杯

介族生螭蚌杯形肖隴禽曾經良匠手見愛主人心置  
在金樽側來從珠水潯

陸機薦戴若思曰明珠大貝生于江鬱之潯

願為仁

者壽再拜莫辭深

上苑

漢藥春來早  
光風近太清  
花深迷玉漏  
霧遠失金莖  
夾道青松密  
周阿碧樹生  
回瞻葱鬱氣  
遙覆九重城

山中

乘秋尋遠壑  
偶到幽人家  
濁醪釀秫米  
香飯炊胡麻  
微徑捫蘿薦  
高峯弄雲霞  
餐和殆忘返  
落景半規斜

東溪早步

宿雨澄紛幕  
高霞冠遠岑  
青蓮護水色  
翠竹結村陰  
雪浪魚跳藻  
風簧鳥嘯林  
峭帆天末起  
撩動五湖心

水館

略約橫雲島欄干瞰玉淵雨汀翹睡鷺風樹咽嘶蟬綠  
髮莓苔地紅衣茵茵天夜涼三弄笛月在釣魚船

送徐晉卿東歸

夜來龍具冷有客厭長安去國朝衣綰還家楚葉丹雪  
情欺酒薄月思拂琴寒只待東風起林鶯振美翰

送旌德田宰

錦邑罷鳴琴歸塗指上林柳鞭饒醉折山館勝遊吟清



譽時苗犢離棕望帝禽明庭趨覲日優績簡宸襟

招公儀小飲

官舍隱非隱仕途才不才棟閒秋燕去籬靜晚花開卓  
甕何妨卧莊軒或自來求羊疎我甚三徑有青苔

朱鳥航

浮航二十四一一跨淮中此地名朱鳥當年踏彩虹香  
塵迷舊路寒水蕩遙空日暮驚飛蓋翩翩下渚鴻

余山人居

一室閑春林蕭然物外心  
暮聲敲月重履齒印苔深竹  
閣茶烟細山園鍛樹陰會當逃世網來此締朋簪

和人山居

翠柏蔭山莊巖扃四序涼  
歌攀牛角遠嘯引鳳音長夕  
膳烹葵熟春杯切桂香列侯生計在千戶橘含霜

山居

松韻笙竽徑雲容水墨天  
人行春色裏鶯語落花邊脩  
竹三間屋清泉二頃田了無官府事雞犬莫登仙

經朱氏郊居

東岡接釣磯有客偃郊扉繞舍喧流水當牕識翠微溪  
田香稂熟霜樹晚桃稀半日揮塵袂停車不記歸

送外表王植赴官嶺外

五嶺知何許離懷豈易言傳情無去鴈驚夢有啼猿溪

思吳萼老

別墅在梁溪

林香越槿繁渠渠持美酒計日望歸

軒

銀臺退朝

官事良為少人生初得閒長吟聊擁鼻薄酒且醺顏春  
物行將晏年芳尚可攀此心同木鴈材與不材間

桃葉渡

悵望情人曲空留此渡名一條衣帶水千古石頭城艷  
歌雙桃色歌沈雨漿聲不堪懷古意山外夕陽明

春寒

三楚多寒地憑山復大川龍鱗橫雪隰羊角起風天酒  
價高平日花期晚去年白門無限柳疎瘦未成眠

蓬萊詞

瀛閭盛佳招排雲下赤霄水犀梳插鬢火玉佩垂腰鳧  
影朝青鳥鸞音咽紫簫鼇宮無夜色豹髓未嘗燒

寄合肥知己

離管回香轡行舟動翠篙夕魂惟是黯春目旋成蒿夢  
與楊花蕩書憑燕子高望中人不見湖上首重搔

題蘭溪

招提紫翠中僧住最高峯幾劫親諸佛三生聽此鐘早

香依澗樹高臘寄庭松性海無窮願金書字字濃

師道  
大悲

像著發  
願文

景福殿緋桃

偷約蓬山客閒尋芳樹蹊晨葩鮮欲語春色醉成迷艷  
奪朝霞段香傳冰麝臍飄然凡境外初有乳鶯啼

暑夕水亭

曲檻瞰回塘披襟對羽觴蘋風微有韻水月自成涼嫩  
篠踈踈影新荷偃偃香么絃聊按撫志不在滄浪

新荷

一夜抽輕蓋平明映曲池  
水涼魚未覺烟淨鳥先窺  
露重心猶卷風多柄尚危  
東林應結社祇待素華披

惜花

試步向欄干奇花正好看  
乾坤增著力風雨莫無端  
彩筆題詩易金刀下剪難  
十分方吐半猶喜夜來寒

晴虹

霽野收雲雨長光架一條  
媧天初補石乾鵲早成橋  
日

馭迷黃道仙梯接絳霄誰能乘六氣萬里信扶搖

邑宰惠花木

曉園分花品烟靚手自攜未貪桃結實且映李成蹊  
瞥見香蜂集仍聞好鳥啼河陽春色晚流過短牆西

行次淮上寄何筵秀才

南浦傷離數西州作惡頻吟亭蟬送柳宿枕鳥驚晨  
鄴會疎沈李吳懷豫憶蓴此心何用慰前有杏園春

秦淮



厭勝踰千載祖龍安在哉  
寒潮平復落幽鳥去還來  
龍鑿功全異牛山事可哀  
不知終古恨誰見劫成灰

重陽日東園

沆瀣催時律幽陰結夕霏  
樓臺侵日上山水送秋歸  
海燕辭巢盡霜鴻避弋飛  
一杯元亮酒聊以浣塵機

宿白佛寺

下馬憇禪關春苔一徑斑  
歸雲尋谷口倦鳥泊林間  
山客收碁罷龕僧數息閒  
月高人不寐隔嶺水潺潺

甘露寺

寶勢窮吳地寒流對楚邦一峯擎佛剎萬象入僧牕落  
日銜遙樹晴虹畫半江海門秋色近翠朶自成雙

自詠

索米年來甚伶俜祇自知黑貂隨日敝葆髮豫秋衰舊  
產思重理先賢恥逆施呂虔刀未解骨法謾多奇

閉戶無還往端居廢禮容花為貧富醺燕是舊過從持  
屐對人蠟綻衣看婦縫非同叔夜傲切莫怪疎慵

華陽逋客

小隱華陽客山中不記年酒中長有聖  
碁下更無仙授得廣陵散注成秋水篇  
吾纓今未濯慚愧舊林泉

瓦官寺

紫色嘗開國金輝此界繩火輪經壞劫  
雪頂見殘僧狂薜綠秋壁深松映晚燈  
哀猿不可聽一一在巖藤

題劉奉禮書齋

人尚西齋學家承北第榮錦囊添句重  
蟾滴試毫輕

底法成新構，開書泣舊楹。丹山消息斷，喜見鳳雛聲。

和吉老學士召赴崇政殿試舉人

需宴經芳已，嚴趨奉禁宸。子亭參覆試，止輦奉周詢。

詔

累幸泛  
覽試卷

玉取三燒粹，金求百汰真。自慚諸老意，多賴洛

陽人

清明日謝人送酒

寂寞揚雄宅，鴟夷載酒來。鱗榆試春火，切桂暖晨杯。芳

藥何須菊，香梢尚有梅。自慚非叔夜，聊學玉山頽。

金山寺

寶勢中流起香園此布金鵠棲金殿冷龍伏夜潭深水  
鳥衛生食江神聽梵音上方聊送目天幕杳森陰

齊國大長公主輓詞

舊築王姬館新開貴主阡山林經駐蹕烟霧隔飛軒天  
屬尊惟孝邦風穆以賢鸞龍擣翰藻昭德萬斯年

兵部尚書贈司空侍中晏元獻公輓詞三首

俊老三階後高華四紀中朝廷用文治廊廟得才雄雞

樹前陰改鱣庭舊跡空生存華屋處零落恨無窮

川嶽淪精氣風華喪傑才典刑留大雅文象坼中台聚

窟香難破釣天夢不回只應之帝所鳴玉侍丹臺

公早被章

聖顧  
遇

儲極元寮寵公貂盛策班寧神依大駟結冢近陘山鼓  
吹春風裏麒麟夕照間寄言川上水何事不西還

太尉文肅鄭公輓詞三首

西北謀元帥東南出雋儒上前曾借筇閫外復投壺見

器同安國憂邊得亞夫如何遡黃壤不及播洪爐

公業闕東望夷吾天下才辭鋒橫劍戟詩筆走風雷帥  
節行邊去氏酋獻地來榮華一朝盡埋玉使人哀

將鉞徵聯重公槐賁典加哀榮班祿袞虧痛軫投瓜朝  
露沾崇旆秋風咽迴茹英靈不可問宰樹有棲鴉

太尉侍中鄭國宋公輓詞三首

第一平津策同時入洛名配台升上相宰漢得元精國  
念靈龜喪人嗟厚棟傾睿篇傷俊老殊禮極哀榮

盛業元根古高文早變風墮鱣遺館在浴鳳舊池空卓

馬辭丹陛

公以使相還節三公薨第

騎箕向碧穹琴箏三月罷鄭國

愴賢公

天上三台坼人間一鑑亡寧神韓土內結冢颿山傍槐  
鼎獻儀物貂蟬祕密章高賢同委化茲理昧蒼蒼

座主贈司徒侍中宣獻公輓詞五首

天下中庸德人倫正始風立朝周鼎重當代禹門崇注  
意深黃閣收神杳碧崧蒼生終古恨尺璧在丘中



三陟贊樞釣殲良昧上吳幾傳分相史終未立家臣衛  
武徒虛語巫咸不可詢空餘山甫德流詠在蒸民

門盛三鱣講書追兩馬修朝評尊月旦王法正春秋革  
履聲長絕緇衣詠獨留從今非大醉不復過西州

鳳德哀何早蛇年識有開斂衣班上袞懸厠責中台綠  
鵠空存飾騎箕不下來棟隆今已折僑壓可勝哀

鹵簿指西州都人助紼謳白雞亡謝傳黃石葬留侯霧  
薄旌銘慘風長騎吹愁神華何處所流恨滿山丘

禮部蔣侍郎輓詞五首

大雅時之老高陽世有才英名知四海公議許三台華  
皓辭歸去蒼黔望起來一朝蒿構毀慰用感餘哀

香案經為吏甘泉預侍晨衣冠親雉尾章疏動龍鱗當  
世高人物諸公滿搢紳忽聞捐几杖萬恨只酸辛

潁水重臨久

公再領  
吳郡

桐鄉見愛深峴碑偏墮淚鄭瑟盡

停音蜀士知鄒學吳兒喜洛吟

公在蜀在吳留意學校  
精于篇詠人多傳誦

生前祠影在寒霧碧山岑

尺璧丘中恨人間第一流九原迷白日萬壑怨清秋風  
月高情盡煙霞麗思休故時芝館在迢遞使人愁  
茂苑來書跡藍橋別淚痕如何一交臂不覺九招魂東  
里嗟遺愛西州哭舊恩二孤猶在邕未免懣乾坤

翰林南陽葉公輓詞三首

方丈仙山地承明帝所人辭源長萬里筆力重千鈞草  
詔風雷暮賡歌律呂春如何巖雨望奄忽棄生民  
獻替依明主周旋奉至公直尋無枉道方寸有孤忠恥

在瓶鼎聲嗟深杼軸空蒼生猶未泰夫子已先窮

遠策思開濟孤飛易中傷中途捨騏驎少日鍛鸞鳳干

鏌乃雙折臯夔遂兩亡

公與故太尉鄭公為莫逆之友不數月相繼薨落同時葬于吳

下子實被二公獎賒

吾生知己矣魂斷武丘傍

### 題飲光亭

居易能藏氣探幽復治亭泉華聊自挹澗響與誰聽圓  
檜行依蓋前峰坐對屏一瓢吾道在涼月此忘形

### 晨起馬上口占

馬過津橋外城臨金斗傍

金斗肥城之名

早霜濃著瓦落月半

銜牆暗水澄寒底初霞漏曉光疎鐘林下寺煙景正蒼

涼

九月十五夜北樓望太湖

雲影消空闊霜華拂杳冥秋光不隱鴈夜色欲迷螢爽  
氣橫蒼下涼波接洞庭水仙當此夕應化白龍形

登潤州城

城壁起山根樓梯易黯魂雄風搖碧浸畫角弔黃昏一

帶分江紀雙峯點海門東方瞻宰樹秋色暝前村

懷宣城會勝院二首

淨刹枕城隅溪光清且虛僧閒對馴鴿客至數游魚巖  
氣浮川上林香生雨餘南雲雖可望長與沃洲疎

城外尋僧遠居常信馬蹄移時取香飯半日濯靈溪白

馬迎人下清猿對客啼亭前有封殖試為問紅梨

沃洲亭前

有梨樹玉溪生有  
崇文館紅梨之句

仲春三衢道中

隔閏年芳早天風泛暖暉酒香迎社重村語向蠶稀林  
際新鶯出楹間故燕歸湖頭春在否人去柳花飛

贈少室王山人

九籥秘仙經巖巖玉骨靈內書天上見仙樂帝前聽壺  
小藏仙界槎高拂斗星華陽陪夜話多是說金庭

送錢比部守盛山

家世楹書在山河廟券存烏衣出才子朱轂滯王孫過  
峽朝雲舉辭梁臘霰翻遙知巴子國愛日有餘溫

金定四庫全書  
卷二  
聞鶯

雙翎何曉曉百轉更綿蠻獨向芳林宿多衝細雨還低  
迷穿柳外調笑入花間肯比青鸚鵡雕籠受閑闌

送顯忠上人歸吳郡

秋風隨處起振錫不留行卻背嵩雲去迎看淮月生禪  
通少林默詩得杼山清幾夕巖窓下忘眠聽瀑聲

文恭集卷二



欽定四庫全書

文恭集卷三

宋 胡宿 撰

五言律詩

芳茂山

此地橫青嶂當年聳紫氛

晉時常有紫氣現

碧花巖下柰玉葉

嶺邊雲竇勢三神秀靈風百草薰將軍精爽在可解勒

移文

晉將軍曹橫葬此

浮石寺

溪碧照浮航仁祠紫界牆  
牕扉銜遠色樹石納餘涼  
升講林花落拋生水鳥翔  
逢僧談止觀數刻盡牛香

案牛香二

字不經見法苑珠林有云牛頭之香生于海岸此殆節用之

送張著作任柘城

出宰分襄邑修書得秘丘  
青雲莫厭晚翠柏最宜秋  
舊學緇林散前驩醉墨留  
弦歌聊自慰不足論金牛

別墅園池

小池連曲圃幽可滌煩襟露菊凝秋艷風荷結晚陰碧  
蘆巢鳥重青藻宅魚深自是輪蹄外囂塵宜易侵

送曹生歸臨江別墅

氣入商中勁人思瀆上勞滄江縈故國涼月伴歸舫麗  
賦憑烏有清篇託畔牢

案畔牢二字不經見漢書揚雄傳有云書名畔牢愁此殆節用

之竹林溫緒業天穀佇時髦

寄善慧大師禪齋

金策巡方罷齋軒俯斗城池閒魚聽法臺靜鳥窺生社

影香蘂白禪陰碧柰清昆灰多妙辨

案昆灰二字不經見當即是昆明劫

灰語節用之

平日集朝纓

小閣

小閣閉春風疎簾隔幾重柳絲收未住酒病太無悰帶  
眼偏知瘦碁圖最信慵隆中一覺睡日影過高春

悼往

昨夜西樓月團圓似去年鳳屏非復舊虎枕未成眠破  
恨憑湘酎

案

湘酎原本作相酎攷謝惠連雪賦有相酎吳之醇酎句詩蓋節用之今改正

流辰

寄蜀絃萬華與參宿

案萬華二字不經見攷梁樂府前漢歌黃葛何蒙龍生在洛溪中花

落隨流去何見逐流還此蓋節用其語

此見恐無緣

### 江樓

亭亭紫桂樓渺渺白蘋洲  
易斷傷春日難銷假日憂  
雙鳬仙子貴兩漿美人愁  
欲寄青泥訊雲峯隔舊遊

### 初赴揚子任

補吏承人乏安貧得士常  
半綸朝受命數舍宿春糧

自蘭

陵抵儀真數舍而近楚地元三戶  
騶奴亦一囊  
空裁宣德頌何路

奏明光

徐偃王廟

天下慢朝周君王瑤水流一朝規問鼎千里御還醵故  
國無歸日叢祠幾換秋詵詵耳孫慶惟烈在仁柔

邑人  
率多

姓徐云  
其苗裔

清溪泛舟

家在清溪上乘閒一棹歌夕涼天有月秋迴水無波鷗  
鳥機心斷鯪魚香味多吾纓猶未濯終是負漁蓑

一年好景

樽俎真無奈風騷亦被魔  
酒龍春力健詩將夜謀多  
未羨封侯印偏憐卻日戈  
寄言嵇叔夜休惜玉嵯峨

早鴈

闕樹來時紫江楓到日丹  
驚弦初月上避弋太虛寬  
野水涵秋色霜雲結夜寒  
終年南北路未可笑離鶯

寄懷尊師

案尊師工  
似有脫文

多年疎法集長夏憶齋房  
桐雨生苔淨杉風坐石涼  
真

金少卿集卷三  
茶烹潤溜滿飯取天香何日揮冠冕相期作道場

華陽道士朱尊師

閨苑花邊醉知君是謫仙姓名金簡上官職玉臺前碧海三奇藥青梯尺五天祇愁騰踏去相望隔芝田

紫薔薇

天上星垣貴人間花品高偷模煩象管學剪費金刀西母停雲輦東卿駐節旄曉軒無限思香架近蒲桃

晨入都省聞子奇內翰宿太常因寄口號



相思禁林客知奉太常齋月落桐依井風休絮滿堦歡  
娛疎勝集申寫寄長懷遙望牆東隱朋簪香未諧

又陪公素舍人晨入西閣見紫薇初開

疎雨休前檻新英艷小叢且欣當夏日不用憶春風便  
可攜歡伯相從作醉翁回頭問堦樂何處覓薦紅

題擷芳亭

有客隱東岡珍亭號擷芳仙壺分氣象木帝借風光淥  
水穿林遠朱橋跨岸長寶隣曾折桂今是狀元坊

擷芳主人

乃今副閣徐  
公之里閨也

初秋

九夏困煩冤逢秋似得仙  
短牀便月下長簟怯風前  
露氣清羣木雲稜澹一天  
西江無限水長嘯憶樓船

七言律詩

大慶殿元會

殿裏爐香散彩雲殿前旌仗從朝曦  
后夔六樂調時律  
太皞千春入御樽  
神化還隨蒼震始  
天顏卻映少陽溫

新年喜氣知多少鬱鬱葱葱覆九門

燕洞宮

洞裏青娥赤玉簫香童迎過百花橋身輕不待冷風馭  
天隔難逢翠羽翹仙醴四升誰酩酊使烏三足自飄飄  
座中若話金庭事記取真人是子喬

張侍讀箋注太玄經義

陳書覆瓿久無憐天幸名儒釋舊文準易一時遭客難  
賞心千載獲神交高情要在崇孤學餘力猶能解衆嘲

誰道鳳凰難得髓續絃今日見靈膠

賞花釣魚應制

球檻靈芳濯露開  
瑤津朱鮪復新來  
三竿御水承垂釣  
萬藥晨葩奉賜杯  
春暖僊裳初霍靡  
日斜芝蓋尚徘徊  
柏梁聖作星躔麗  
累氣蕪音愧仰陪

咏蟬

柳條高處不須吟  
正是螳螂負異心  
已斷清腸悲玉露  
更流哀響入瑤琴  
長洲苑下風聲急  
宣曲宮中暮色深

莫道齊姬無伴侶海邊精衛亦冤禽

登雄州視遠亭

誰將粉水掃天衢萬里全開晦景圖百尺凍雲飛未起  
一箏寒鴈遠相呼由來封略非三代大抵漁樵似五湖  
欲望繁臺何處是繁臺不見見平蕪

予家在京城東南繁臺之下繁音婆

送錢子文著作宰福陽

三政平反有惠心民歌遙望邑中黔桃翻浪影吳艤急  
芸掩書香漢閣深行訪名山須著屐坐清囂俗且橫琴

西州有客偏傷別無密瑤華寄好音

題承詔亭

開徑臨江有舊居野亭于此狎禽魚  
八才素擅高陽里五返曾迂使者車  
圯上早傳黃石略隆中難戀武侯廬  
主人今醉葡萄酒籬下秋風菊自疏

送清漳護戎王中立

賦別慙慙涕泣然七閩封堠接蠻煙  
山長水遠知何處花落鶯啼又幾年  
顧我青衫隨吏牒惜兄華髮事戎旃

風波世路相逢少腸斷東歸下瀨船

送呂昭鄰同年宰巫陽

清藥君宜妙一臺當年仙桂竝枝開樓逢春雪嘗為曲  
廟近朝雲轉費才遠字莫教雙鯉斷歸期偏望二鳧來  
巴猿蜀魄多離恨猶喜圭田助酒材

送李寺丞宰攸溪

短李祠堂世閱餘少年從學馬融居樓中質問無疑義  
帳後傳藏有默書茂苑卻尋花氣歇家山重上桂陰疏

弦歌莫嘆浮湘遠，纔是青雲舉足初。

寄題黃氏閒宴閣

翬飛迢遞拂秋槎，宴坐塵清道有芽。  
五葉對僧談妙果，一槍留客試真茶。  
簷前暮景沈歸鳥，牕外晨暉泛早霞。  
衍篋文多休寄傲，月間芳桂正窅窈。

和遂卿館中晚入

案遂卿原本誤作遂卿致宿他詩作遂卿又韓琦安陽集亦有

和遂卿學士詩  
今參校改正

銅狄嚴扉大帝家，雨回天氣湛春華。  
牆頭落景半規日。



樓外餘暉幾疊霞  
風近天淵聞鶻煙  
開宮樹見棲鴉  
端門漏密長廊靜  
時見香英墜砌花

朝罷

朝罷通中一覺眠  
右銀臺路入西垣  
日長易覺芝泥熟  
風軟頻驚藥樹翻  
朱檻帶陰難可倚  
紫薇當晝不勝繁  
何須更寄陶牕傲  
自有餘涼在此軒

送梅監丞宰山陰

春半朱航拂水輕  
季珪佳邑得時英  
民淳定見蹊田默

歲稔仍占射的明太史舊遊書穴邃右軍殘跡墨池平  
何妨公外尋僧社琴鶴相隨雅有情

送集賢李學士赴荆臺

蓬島迴風此再來當年俱重輯寧才芝隨禁掖新泥熟  
桃應仙源舊路開金契旋聞臨外閭雲屏仍是接中台  
時丞相大學士兼領書殿之職專城四十前賢事期歲行歸妙一臺

子莊見求近詩以一闕為介

半綸祇役謝英遊牒訴裝懷思若抽銅鉢任敲何所得

鐵盃雖缺豈銷憂  
楚囚操樂寧忘本  
蜀客摘辭祇傍愁  
強挾巴音還首鼠  
知君詩戶敵千侯

送張從事

月臺揮檄愈頭風  
屈佐初賓位未充  
金玉擅珍須席上  
蛟龍為物起池中  
叢雲綯彩人歌舜  
綿竹摘辭客薦雄  
一乘追鋒看賜對  
虎賁千戟照瓊宮

山居

老矣求田魚稻鄉  
兒孫常要在余旁  
提籃買菜須靈照

舉案齊眉只孟光  
醫國有方三折臂  
扣關無路九回腸  
紫芝白髮秋風裏  
悵望商山綺與黃

寄子高秦州從事

雪裏詩筒至自秦  
仲宣佳句樂從軍  
谷鶯漸喜遷高處  
塞鴈猶嗟失故羣  
北闕舊遊孤似月  
西州迴望遠如雲  
一枝春色無由寄  
手弄梅花卻自薰

和曼卿館中夜直

右銀臺路逼僂盤  
有客通中此宿官  
鈞奏暗驚天上近

霞杯難制月邊寒風來禁樹龍傳點露下高梧鳳戢翰  
更聽建章魚鑰動水蒼朝珮響珊珊

遠思

一片平蕪百尺樓闌干橫絕點清秋三年字與燕鴻斷  
千里心隨桂水流空對霜葭驚遠別忍題雲葉寄牢愁  
驪駒不見西曛迫目眩天涯片席收

和遽卿寒直

子門肅唱徹周盧甲夜輕寒臘破初樹底勅飛還類鵲

齋中酣夢欲成魚三鍾賦粟才無取五餌干時策已疎  
天祿舊來名寂寞更堪牕雪照殘書

九日山陽驛作

飄泊年來憇下亭  
雀羅秋靜掩苔扃  
拂牕紅葉欺閒臥  
倚檻黃花笑獨醒  
盛憶林泉羞白石  
欲持香火訪丹經  
華陽小隱平生願  
可分區區事挈瓶

趙宗道歸輦下

泂牒相逢楚水湄  
竹林文酒此攀嵇  
半甑未暖還傷別

一臂初交未解攜江浦嘔啞風送檣河橋勃窣柳垂隄  
明年四月秦關到洗眼揚州看馬蹄

送天章王待制再領陝州

愛樹重攀隔十春召南遺俗至今淳車邊野鹿依明府

鄭洪行春有  
白鹿夾轂

池上沙鷗識主人

園池之勝  
甲于雍部

太華遠峰捫

日馭洪河高派落天津壺漿竹馬參歌舞頓覺城中喜

氣新

咏鶴

獨立青田刷羽儀朱研丹頂雪裁衣賦來自合凌清漢  
仙去何曾識令威松蓋露寒應有恨逢山雲斷未成歸  
舊巢寄在三珠樹待與還丹作使飛

舊將

曾上燕然勒漢兵白頭麟閣見儀形三朝自是山西將  
百戰曾焚老上廷已奉列侯歸北第更籌深策破先零

案先零見漢書趙充國傳西羌先零注鄭氏攷變考方擊劍  
曰零音憐無作陵音者此入九青韻蓋失攷

平生事不許兒孫授一經



七夕

孔雀南來燕子西，銀河消息已驚遲。  
石城仙使飛三足，玉殿華燈焰九枝。  
暫掄星機同一笑，卻披雲幄重相離。  
祀天長在年後疾，若比人間是遠期。

宛陵秋晚

誰道江南好物華，江南今日抵天涯。  
秋風只解吹桐葉，暮雨還來打菊花。  
寒水荅砧偏響亮，迴樓飄角更嘔啞。  
舉頭試作長安望，惆悵青山遠郭斜。

海上

天幕紛紜海水浮  
日車東上惡埃收  
金鈎欲下靈鼈怖  
鐵網將沈寶樹愁  
自昔神仙嘗有藥  
從來銀闕不通舟  
燕酣餐盡蟠桃熟  
會約琴高控鯉遊

夏日舟行

箭激雲檣五兩輕  
波光飛入射桃笙  
山眉遠映羣鷗過  
霞綺新和落照明  
甘醴更無消暑意  
文竿徒有羨魚情  
飄颻若得乘羊角  
直待銀潢上玉清

送呂解元江陰禮席

玉人仍是紫芝眉  
五世嘉占得鳳飛  
果滿車中潘令去  
馬盤樓下庾郎歸  
東牀寄傲便便腹  
北路騰裝粲粲衣  
九燭夜堂開喜宴  
畫鸞交扇接香幃

送祝熙載赴金華主簿

數路收才漢得人物  
塗聊試半通綸宸  
廷唱第瑤光近  
仙簡刊名玉字新  
芳桂行吟闕外月  
香葩回夢苑中春  
平時官下文移少  
日涉閒園戲綵頻

泛舟

瑟瑟涼波冷接空  
恍疑雲物畫屏中  
一篙海客乘槎水  
兩漿仙人取箭風  
秋色暗欺荷蓋紫  
夕陽偷射桂旗紅  
長來此地無窮樂  
珍重苓蓍與釣筒

送王龍圖碩赴荆南

南部行臺駐萬兵  
繡衣歸路有光榮

龍圖往時領漕荆  
北別墅復在武昌

鳴鏐虎豹林中避  
吹角蛟龍水底驚  
湘樹遠從湖外出  
峽雲時向馬前生  
主人落筆多風調  
應唱新辭徧郢城

送陳鐸歸吳興

六篇高論吐虹蜺  
報罷扁舟擊汰歸  
地上麒麟須遠到  
天邊鷹隼且卑飛  
秋來苔下醪醅熟  
寒去江頭鱸縷肥  
莫嘆隋和猶未售  
玉蟾濡翰待君揮

寄題雄州宴射亭

北壓三關氣象雄  
主人仍是紫髯翁  
樽前樂按摩訶曲  
塞外威生廣莫風  
龍向城頭吟畫角  
鴈從天末避瑯弓  
休論萬里封侯事  
靜勝今為第一功

送吳江知縣陳著作

南望湖山畫一屏  
松江江水向人清  
何如喂壘聊為活  
況是瀟湘謾得名  
雙漿有時青翰遠  
兩衙無事素琴橫  
遙知惠政通和氣  
乳雉馴鷗自不驚

贈華陽道士朱尊師

卻餌英芝養道芽  
赤霄曾輟絳雲車  
眼看碧海成夷路  
心記蟠桃結實花  
東府靈方修白石  
上清香飯給胡麻  
兩雙條脫皆金玉  
可是南山夢綠華

仲夏有感

誤逐時英落穀中拙艱為吏悄無悰鷄鵠已享鳴鐘賜  
漣統馬知裂地封西北晚雲長望闕東南春畝久拋農  
忽忽禹鑿當年事猶待神雷起蟄龍

上元禁樂

丙子歲

此夜重城鳳腦寒放遊車馬接通闕漢祠歌罷天壇冷  
鈞奏聲沈帝所閒紅蠟枉殘春色裏青樓空占月明間  
仙壺定有尋芳處公子雕鞍兩兩還

暮冬離京師

雪中愁買出關符又著青衫事府趨燕市有金還貴馬  
鄧林無樹可棲烏鴟夷痛飲傾家釀如意狂歌缺唾壺  
朝野多歡天子聖目瞻東闕步踟躕

感舊

萬里青雲未致身馬蹄空踏幾年塵曾迷玉洞花光老  
卻過金城柳色新粉壁已沈題鳳字酒壚猶記姓黃人  
塢中橫吹偏多感一涕闌干白角巾



落葉

霜華昨夜拂秋林  
翩落紛紛不自禁  
清吹無時來檻底  
紫苔相伴住牆陰  
空餘倦鵲求枝宿  
更剩殘蛸抱撲吟  
萬物歸根真趣在  
卻緣江月識禪心

嘲蝶

三春流寓寄花房  
雌去雄飛過短牆  
雙翅薄勻何晏粉  
一身偷帶賈充香  
風多苑後飛無數  
日煖池邊舞更狂  
卻為有情人愛惜  
六宮皆作繡衣裳

飛將

曾從嫖姚立戰功朔方猶畏紫髯翁  
雕戈夜統千廬會緹騎秋收五柞宮  
後殿拜恩金印重北堂開宴玉壺空  
從來敵國威名大麾下多稱黑綃公

公子

北第當衢戟有衣巾帷鮮媚僕如屏  
萬錢供箸鳴鐘沸三組垂腰佩玉低  
座上賦鸚窮處士樓前盤馬小征西  
去天尺五城南路此去青雲別有梯

古別


長道何年祖輟休風帆不斷岳陽樓佳人挾瑟漳河曉  
壯士悲歌易水秋九帳清油徒自負一作貴百壺芳醕豈  
消憂至今長樂坡前水不啻秦人怨隴頭

函谷關

天開函谷壯關中萬古驚塵向此空望氣竟能知老子  
棄繻何不識終童謾持白馬先生論未抵鳴雞下客功  
符命已歸如掌地一丸曾誤隗王東

案隗王今宋詩紀事刊本作隗生攷

後漢書隗囂傳長陵人王元為大將軍說囂曰請以一  
丸泥為大王東封函谷關即胡宿詩句所本刊作隗生  
者誤附識于此



文恭集卷三